

REGIONAL NEWS UNIT
ALL INDIA RADIO, AGARTALA
Date: 23-06-2024
Time: 07:55-08:05 PM Hrs
BENGALI EVENING BULLETIN

Headlines :

- (১) আসন্ন ত্রিস্তরীয় পঞ্চায়েত নির্বাচনের জন্য চূড়ান্ত ভোটার তালিকা আগামীকাল প্রকাশিত হবে ।
- (২) প্রখ্যাত চিন্তাবিদ ও শিক্ষাবিদ ড: শ্যামাপ্রসাদ মুখার্জীর প্রয়ান দিবস আজ যথাযোগ্য মর্যাদায় পালিত হচ্ছে ।
- (৩) অষ্টাদশ লোকসভার প্রথম অধিবেশন আগামীকাল বসবে ।
- (৪) রাজ্যভিত্তিক সিনিয়র ক্রিকেটের এলিট গ্রুপের খেলায় আজ মোহনপুর জয়লাভ করেছে।

Panchayat-final voter list:

রাজ্যে আসন্ন ত্রিস্তরীয় পঞ্চায়েত নির্বাচনের জন্য চূড়ান্ত ভোটার তালিকা আগামীকাল প্রকাশ করা হবে। মোট ৩৫ জন নির্বাচন নিবন্ধন আধিকারিক তথা বিডিও স্ব স্ব ব্লক এলাকার নির্বাচনী ক্ষেত্রগুলির চূড়ান্ত ভোটার তালিকা প্রকাশ করবেন। তারা গত ৬ জুন খসড়া ভোটার তালিকা প্রকাশ করেছিলেন। খসড়া ভোটার তালিকায় মোট ভোটার সংখ্যা ১২ লক্ষ ৯৫ হাজার ৮৬ জন। এদিকে রাজ্য নির্বাচন কমিশন রাজ্যের ত্রিস্তরীয় পঞ্চায়েত নির্বাচনের জন্য আনুষ্ঠানিক সব ধরনের প্রস্তুতি নিতে শুরু করেছে। এই নির্বাচনে ৬ হাজার নয়শো'র ও বেশি আসনে ভোট গ্রহণ করা হবে। এরমধ্যে আটটি জিলা পরিষদে আসন রয়েছে ১১৬ টি,

পর্যটনশীল পঞ্চায়েত সমিতিতে আসন ৪২৩টি এবং ৬০৬ টি গ্রাম পঞ্চায়েতে মোট আসন রয়েছে ৬৩৭২ টি।

PM- Shyamaprasad:

প্রধানমন্ত্রী নরেন্দ্র মোদী প্রখ্যাত চিন্তাবিদ ও শিক্ষাবিদ ডঃ শ্যামাপ্রসাদ মুখার্জীর শহীদান দিবসে আজ তাঁর প্রতি গভীর শ্রদ্ধা জানিয়েছেন। প্রধানমন্ত্রী সামাজিক মাধ্যমে বলেছেন, দেশ মাতৃকার সেবায় তিনি নিজের জীবন উৎসর্গ করে গেছেন। তাঁর গতিশীল ব্যক্তিত্ব দেশের প্রতিটি প্রজন্মকে অনুপ্রাণিত করে যাবে বলে প্রধানমন্ত্রী মন্তব্য করেন।

এদিকে, কেন্দ্রীয় মন্ত্রী তথা বিজেপি'র সর্বভারতীয় সভাপতি জে. পি. নাড্ডাও নতুনদিল্লীতে দলের সদর দপ্তরে শ্যামাপ্রসাদ মুখার্জীর প্রয়ান তিথিতে তাঁর প্রতি পুষ্পস্তবক দিয়ে শ্রদ্ধা জানান।

BJP- Shyamaprasad Mukherjee:

বিজেপি'র উদ্যোগে রাজ্যেও বিভিন্ন স্থানে জনসংঘের প্রতিষ্ঠাতা ডঃ শ্যামাপ্রসাদ মুখার্জীর প্রয়ান দিবস আজ পালন করা হয়। এই উপলক্ষ্যে প্রদেশ বিজেপি কার্যালয়ে স্মরণ সভার আয়োজন করা হয়। উপস্থিত ছিলেন বিধায়ক তথা আগরতলা পুরনিগমের মেয়র দীপক মজুমদার, বিজেপি রাজ্য সভাপতি রাজীব ভট্টাচার্য সহ অন্যান্য কার্যকর্তারা।

বনমালীপুর বিজেপি মন্ডলের উদ্যোগে আয়োজিত স্মরণ সভায় উপস্থিত ছিলেন বিজেপি রাজ্য সভাপতি রাজীব ভট্টাচার্য।

Shyamaprasad Mukherjee-Khowai:

দলের খোয়াই জেলা কার্যালয়ে ডঃ শ্যামাপ্রসাদ মুখার্জীর ৭০ তম প্রয়ান দিবস যথাযোগ্য মর্যাদায় পালিত হয়। এই অনুষ্ঠানে উপস্থিত ছিলেন খোয়াই

জেলা সম্পাদক মাধব চক্রবর্তী, খোয়াই পুর পরিষদের চেয়ারম্যান দেবাশিষ নাথ শর্মা, খোয়াই মণ্ডলের সাধারণ সম্পাদক অনিমেশ নাগ সহ অন্যান্যরা।

Blood Donation Camp:

ভারত কেশরী ডক্টর শ্যামাপ্রসাদ মুখার্জি'র প্রয়াণ দিবস উপলক্ষে ঊনকোটি জেলার ফটিকরায়ে ভারতীয় জনতা যুব মোর্চার উদ্যোগে আজ এক রক্তদান শিবিরের আয়োজন করা হয়। এর উদ্বোধন করেন তপশিলী জাতি কল্যাণ দপ্তরের মন্ত্রী সুধাংশু দাস। তিনি তাঁর ভাষনে ডক্টর শ্যামাপ্রসাদ মুখার্জি'র জীবনের নানা দিক তুলে ধরেন।

অনুষ্ঠানে উপস্থিত ছিলেন ঊনকোটি জিলা পরিষদের সভাপতি অমলেন্দু দাশ, বিজেপি'র মন্ডল সভাপতি নীলকান্ত সিনহা, যুব মোর্চার প্রদেশ মুখপাত্র অম্লান মুখার্জি, যুব মোর্চার ফটিকরায় মন্ডল সভাপতি প্রীতম বিশ্বাস প্রমুখ। রক্তদান শিবিরে মোট 52 জন স্বেচ্ছায় রক্তদান করেন।

Shyamaprasad-2:

ড: শ্যামাপ্রসাদ মুখার্জি'র প্রয়াণ দিবস উপলক্ষে বিধানসভার উপাধ্যক্ষ রামপ্রসাদ পালের উদ্যোগে আজ সূর্যমনি নগর রেল চৌমুহনী থেকে জনকল্যাণ পদযাত্রা শুরু হয়। এই পদযাত্রার সমাপ্তি হবে আগামী ৬ই জুলাই।

BJP Press Meet:

বিজেপি'র উদ্যোগে ড: শ্যামাপ্রসাদ মুখার্জি'র প্রয়াণ ও জন্মদিবসের পক্ষকালের মধ্যে বিভিন্ন কর্মসূচির আয়োজন করা হবে। আজ প্রদেশ বিজেপি কার্যালয়ে এক সাংবাদিক সম্মেলনে একথা জানান দলের রাজ্য সহ- সভাপতি তাপস ভট্টাচার্য। তিনি বলেন, বিজেপি'র বর্ধিত রাজ্য

কার্যনির্বাহী কমিটির অনুষ্ঠিতব্য সভায় মন্ডল স্তরের নেতৃত্বরাও অংশগ্রহণ করবেন। সাংবাদিক সম্মেলনে অন্যান্যদের মধ্যে উপস্থিত ছিলেন দলের মিডিয়া ইনচার্জ সুনীত সরকার।

CPI (M) - Press meet :

রাজ্যের আসন্ন পঞ্চায়েত নির্বাচন সুষ্ঠুভাবে সম্পন্ন করার মতো পরিবেশ তৈরি করার দাবি জানিয়েছেন সিপিআই(এম) রাজ্য সম্পাদক জিতেন্দ্র চৌধুরী। ত্রি-স্তর পঞ্চায়েত নির্বাচনে বিরোধী প্রার্থীরা যাতে নিরাপদ স্থানে বা ই-মেইলের মাধ্যমে মনোনয়নপত্র জমা দিতে পারেন তার ব্যবস্থা করারও তিনি দাবী জানান। আজ আগরতলায় সিপিআই(এম) রাজ্য দপ্তরে আয়োজিত এক সাংবাদিক সম্মেলনে শ্রী চৌধুরী এই দাবীগুলির কথা উল্লেখ করেন। রাজ্যের সব থেকে পুরাতন আইজিএম হাসপাতালকে সম্পূর্ণ বে-আইনিভাবে একটি বেসরকারী সংস্থার হাতে তুলে দেওয়ার প্রক্রিয়া চলছে বলে শ্রী চৌধুরী অভিযোগ করেন।

এছাড়া, আউই সোর্সিং-এর মাধ্যমে নিয়োগ এবং শিক্ষা ব্যবস্থা সহ বিভিন্ন বিষয়ে রাজ্য সরকারের সমালোচনা করেন তিনি ।

Pineapple :

বাংলাদেশের প্রধানমন্ত্রী শেখ হাসিনার উদ্দেশ্যে রাজ্যের মুখ্যমন্ত্রীর তরফ থেকে পাঠানো হল রাজ্যের সুস্বাদু আনারস। মোট ১০০টি বাক্সে কিউ প্রজাতির ৬০০টি আনারস শুভেচ্ছা উপহার হিসেবে পাঠানো হয়। আজ সকালে আনারস ভর্তি ট্রাক আগরতলা-আখাউড়া সীমান্ত দিয়ে রওনা হয়। আগরতলা-আখাউড়া আন্তর্জাতিক সীমান্তে উপস্থিত ছিলেন রাজ্য সরকারের উদ্যান বিভাগের কৃষি কল্যাণ দপ্তরের সহ অধিকর্তা ডঃ দীপক বৈদ্য ও বাংলাদেশ হাইকমিশনের আধিকারিকরা।

18th Loksabha :

অষ্টাদশ লোকসভার প্রথম অধিবেশন আগামীকাল শুরু হচ্ছে। এই অধিবেশনে লোকসভার নবনির্বাচিত সদস্যদের শপথগ্রহণ অনুষ্ঠিত হবে। প্রবীণ বিজেপি সাংসদ ভাতরুঁহরি মহতাব এজন্য প্রোটেম স্পীকার হিসেবে নিযুক্ত হয়েছেন। তিনি নবনির্বাচিত লোকসভা সদস্যদের শপথগ্রহণ করাবেন। লোকসভার নতুন স্পীকার নির্বাচন করা হবে আগামী ২৬শে জুন। রাষ্ট্রপতি দ্রৌপদী মুর্মু রাজ্যসভা ও লোকসভার যৌথ অধিবেশনে ভাষণ দেবেন সাতাশে জুন। একই দিনে শুরু হবে রাজ্যসভার অধিবেশনও। আগামী মাসের তিন তারিখ সংসদের অধিবেশন শেষ হচ্ছে ।

Amit Shah:

কেন্দ্রীয় স্বরাষ্ট্রমন্ত্রী অমিত শাহ আজ নতুনদিল্লীতে দেশে সম্ভাব্য বন্যা মোকাবেলা প্রস্তুতি বিষয়ে একটি উচ্চ পর্যায়ের পর্যালোচনা বৈঠকে পৌরহিত্য করেন। কেন্দ্রীয় জলশক্তি মন্ত্রী সি. আর. পাতিল, স্বরাষ্ট্র দপ্তরের রাষ্ট্রমন্ত্রী নিত্যনন্দ রাই সহ বিভিন্ন মন্ত্রক ও দপ্তরের সচিবরা এই বৈঠকে অংশ নেন।

সম্প্রতি দেশের কয়েকটি রাজ্যে অতিবৃষ্টির ফলে ভূমিধ্বস নামে এবং বন্যা পরিস্থিতির সৃষ্টি হয়। আসামের কয়েকটি জেলাতেও লক্ষ লক্ষ মানুষ বন্যায় ক্ষতির সম্মুখীন হয়েছে।

এদিকে, আবহাওয়া দপ্তর ইতিমধ্যেই এবছর স্বাভাবিকের চেয়ে বেশি বৃষ্টির পূর্বাভাস জানিয়েছে।

Baikhora PHC-Shuklacharan Noyatia:

সমবায় মন্ত্রী শুক্লাচরন নোয়াতিয়া আজ বাইখোড়া প্রাথমিক স্বাস্থ্যকেন্দ্র পরিদর্শন করেন। স্বাস্থ্যকেন্দ্রের বিভিন্ন সমস্যার কথা মন্ত্রীকে জানান ভারপ্রাপ্ত চিকিৎসক ডা: রনদীপ ভৌমিক। মন্ত্রী সমস্যাগুলি নিরসনের

আশ্বাস দিয়েছেন। স্থানীয় পঞ্চায়েত প্রধান সহ ত্রিস্তরীয় পঞ্চায়েতের অন্যান্য জনপ্রতিনিধিরাও উপস্থিত ছিলেন।

Brintak Upgraded to HS School:

দক্ষিণ জেলার বাইখোড়ায় বেসরকারি উদ্যোগে গড়ে উঠা শিক্ষা প্রতিষ্ঠান বৃন্তক শিক্ষানিকেতন আজ আনুষ্ঠানিকভাবে দ্বাদশ শ্রেণীতে উন্নীত হল। এই উপলক্ষে বাইখোড়া কমিউনিটি আয়োজিত অনুষ্ঠানের সূচনা করেন সমবায় মন্ত্রী শুল্লাচরন নোয়াতিয়া। স্কুল পরিচালন কমিটির সম্পাদক মনোজ কান্তি সরকার, সহ-সম্পাদক বিজয় গোপাল গোস্বামী প্রমুখ উপস্থিত ছিলেন প্রথম পর্বের অনুষ্ঠানে। দ্বিতীয় পর্বে অনুষ্ঠিত হয় শিক্ষক-অভিভাবক সম্মেলনে।

BOOKS DISTRIBUTION:

ল্যাংমা-নি হাদুক সোসাইটি উদ্যোগে আজ মাতাবাড়ি বিধানসভার সোনাইছড়ি এস.বি স্কুলের ছাত্র-ছাত্রীদের মধ্যে বিনামূল্যে পাঠ্য বই বিতরণ করা হয়। এই উপলক্ষ্যে আয়োজিত অনুষ্ঠানে বৃক্ষরোপণ করা হয়। এই অনুষ্ঠানের উদ্বোধন করেন গোমতী জিলা পরিষদের সহ কারী সভাপতি দেবল দেবরায়। উপস্থিত ছিলেন বিধায়ক অভিষেক দেবরায় ও উদয়পুর পুর পরিষদের চেয়ারম্যান শীতল চন্দ্র মজুমদার সহ আয়োজক সংস্থার সদস্যগণ।

State level Cricket:

রাজ্যভিত্তিক সিনিয়র ক্রিকেটের এলিট গ্রুপের খেলায় আজ মোহনপুর জয়লাভ করেছে। নরসিংগড়ের পিটিএ মাঠে অনুষ্ঠিত খেলায় মোহনপুর ৭ উইকেটে কমলপুরকে হারিয়ে দেয়।

Olimpic Rally:

আজ আন্তর্জাতিক অলিম্পিক দিবস। এই দিবসকে সামনে রেখে ত্রিপুরা অলিম্পিক এসোসিয়েশনের উদ্যোগে আগরতলায় আজ এক র্যালী অনুষ্ঠিত হয়। রবীন্দ্র শতবার্ষিকী ভবনের সামনে থেকে র্যালীটি শুরু হয়ে রাজধানীর বিভিন্ন পথ পরিক্রমা করে। এতে বিভিন্ন ইভেন্টের খেলোয়াড়, প্রশিক্ষক, ক্রীড়া প্রশাসক ও ক্রীড়া প্রেমীরা অংশ নেন। এদিকে, অলিম্পিক দিবসকে সামনে রেখে ত্রিপুরা অলিম্পিক অ্যাসোসিয়েশনের অনুমোদিত কিছু সংস্থা খেলাধুলার আয়োজন করেছে।

Third Division Football:

ঘরোয়া তৃতীয় ডিভিশন লিগ ফুটবল প্রতিযোগিতার দুটি খেলায় আজ সরোজ সংঘ ও ইউনাইটেড বিএসটি জয়লাভ করেছে। উমাকান্ত মিনি স্টেডিয়ামে অনুষ্ঠিত খেলায় সরোজ সংঘ ৮-০ গোলে কদমতলী যুব সংস্থাকে পরাজিত করে। একই মাঠে অপর খেলায় ইউনাইটেড বিএসটি ৭-০ গোলে ইয়ুথ ক্লাবকে হারিয়ে দেয়।

Women Football:

মহিলাদের ঘরোয়া ফুটবল লিগের আজকের খেলায় ত্রিপুরা স্পোর্টস স্কুল জয়লাভ করেছে। উমাকান্ত মিনি স্টেডিয়ামে সকালে অনুষ্ঠিত খেলায় ত্রিপুরা স্পোর্টস স্কুল তীব্র উত্তেজনা পূর্ণ লড়াইয়ে ৪-৩ গোলে ফুলোঝানু এথলেটিক ক্লাবকে পরাজিত করে। বিজয়ী ত্রিপুরা স্পোর্টস স্কুলের পক্ষে স্রিয়া দেব দুটি এবং বাসন্তি রিয়াং ও মারিনা জমাতিয়া একটি করে গোল করে। অপরদিকে, ফুলোঝানু'র পক্ষে দিপালী হলাম দুটি ও রূপালী হলাম একটি করে গোল করে।

Update Akashvani :

শ্রোতাবন্ধুরা, আকাশবাণীর সংবাদ সহ বিবিধ খবরের বিস্তৃত আপডেট পেতে লগ ইন করুন - ডব্লিউ, ডব্লিউ, ডব্লিউ ডট, নিউজ অন এআইআর ডট কম ও নিউজ অন এআইআর অ্যাপ, এবং টুইটার অর্থাৎ এক্স প্ল্যাটফর্মে। আপডেট পেতে দেখুন আকাশবাণী নিউজ আগরতলা / ফেসবুকে এআইআর নিউজ আগরতলা এবং ইউ টিউবে এআইআর নিউজ আগরতলা।

Weather :

আগামীকাল আকাশ সাধারণত মেঘাচ্ছন্ন থাকবে। দুয়েক জায়গায় বজ্র বিদ্যুৎ সহ হালকা থেকে মাঝারি বৃষ্টিপাতের সম্ভাবনা রয়েছে। তাপমাত্রা সর্বোচ্চ পঁয়ত্রিশ ডিগ্রী এবং সর্বনিম্ন ছাব্বিশ ডিগ্রী সেলসিয়াস এর কাছাকাছি থাকবে। আজ দিনের সর্বোচ্চ তাপমাত্রা ছিল পঁয়ত্রিশ দশমিক পাঁচ ডিগ্রী এবং সর্বনিম্ন সাতাশ দশমিক দুই ডিগ্রি সেলসিয়াস। আগামী চব্বিশ ঘন্টায় রাজ্যের সব জেলায় বিক্ষিপ্তভাবে বজ্র বিদ্যুৎ সহ বৃষ্টিপাতের সতর্কতা জারি করা হয়েছে।
